



Komisija za očuvanje nacionalnih spomenika, na osnovu člana V stav 4. Aneksa 8. Općeg okvirnog sporazuma za mir u Bosni i Hercegovini i člana 39. stav 1. Poslovnika o radu Komisije za očuvanje nacionalnih spomenika, na sjednici održanoj od 14. do 20. marta 2006. godine donijela je

## ODLUKU

### I.

**Arheološki spomenici u sklopu Parka na Vardi ispod Društvenog doma u Konjicu** proglašavaju se nacionalnim spomenikom Bosne i Hercegovine (u daljnjem tekstu: nacionalni spomenik).

Nacionalni spomenik čini 13 arheoloških spomenika prenesenih sa sljedećih lokaliteta:

1. Crkvina i mekteb u Lisičićima - 7 antičkih spomenika,
2. Memidžanovo groblje u Lisičićima - 1 osamljeni stećak,
3. Kod željezničke stanice u Lisičićima – 1 osamljeni stećak,
4. Gošića han u Ostrošcu - 3 stećka,
5. Nepoznati lokalitet -1 nišan.

Nacionalni spomenik se nalazi na lokaciji označenoj kao k.č. broj 434, upisan u zk. uložak broj 709, k.o. Konjic II, Općina Konjic, Federacija Bosne i Hercegovine, Bosna i Hercegovina.

Na nacionalni spomenik se primjenjuju mjere zaštite utvrđene Zakonom o provođenju odluka Komisije za zaštitu nacionalnih spomenika uspostavljene prema Aneksu 8. Općeg okvirnog sporazuma za mir u Bosni i Hercegovini ("Službene novine Federacije BiH" br. 2/02 i 27/02 i 6/04).

### II.

Vlada Federacije Bosne i Hercegovine (u daljnjem tekstu: Vlada Federacije) dužna je osigurati pravne, naučne, tehničke, administrativne i finansijske mjere za zaštitu, konzervaciju i prezentaciju nacionalnog spomenika.

Komisija za očuvanje nacionalnih spomenika (u daljnjem tekstu: Komisija) utvrdit će tehničke uvjete i osigurati finansijska sredstva za izradu i postavljanje informacijske ploče sa osnovnim podacima o spomeniku i odluci o proglašenju dobra nacionalnim spomenikom.

### III.

S ciljem trajne zaštite nacionalnog spomenika, utvrđuje se sljedeće:

**I zona zaštite** obuhvata prostor definiran u tački I stav 3. ove odluke. U toj zoni provode se sljedeće mjere zaštite:

- park Varda bit će održavan i uređen kao konjički lapidarij s ciljem prezentacije spomenika koji se u njemu nalaze i svih konjičkih nekropola putem mape i odgovarajućih opisa;

- na spomenicima u sklopu parka dopušteni su konzervatorsko-restauratorski radovi, radovi na tekućem održavanju i radovi čiji je cilj prezentacija spomenika, uz odobrenje federalnog ministarstva nadležnog za prostorno uređenje (u daljnjem tekstu: nadležno ministarstvo) i stručni nadzor nadležne službe zaštite naslijeđa na nivou Federacije Bosne i Hercegovine (u daljnjem tekstu: nadležna služba zaštite);

- prostor spomenika bit će otvoren i dostupan javnosti, a može se koristiti u edukativne i kulturne svrhe. U tom smislu, u sklopu parka Varda bit će osigurana prezentacija svakog pojedinačnog spomenika, njegove izvorne lokacije i razloga za njegovo izmještanje u park;

- obavljanje radova na infrastrukturi dopušteno je samo uz odobrenje nadležnog ministarstva i stručno mišljenje nadležne službe zaštite.

**II zona zaštite** obuhvata padinu ispod parka na lijevoj obali Neretve. U toj zoni nisu dopušteni izgradnja objekata koji bi zaklanjali i stijesnili parkovski prostor, izgradnja parkirališta, niti odlaganje otpada.

Vlada Federacije je dužna posebno osigurati provođenje sljedećih mjera:

- sanaciju razbijenih, pošaranih i napuklih stećaka, te čišćenje korozije sa spojeva stećaka;

- izradu i provođenje programa prezentacije nacionalnog spomenika.

#### IV.

Stavljaju se izvan snage svi provedbeni i razvojni prostorno-planski akti koji su u suprotnosti sa odredbama ove odluke.

#### V.

Svako a posebno nadležni organi Federacije Bosne i Hercegovine, kantona, gradske i općinske službe suzdržat će se od preduzimanja bilo kakvih radnji koje mogu oštetiti nacionalni spomenik ili dovesti u pitanje njegovu zaštitu.

#### VI.

Ova odluka dostavit će se Vladi Federacije, nadležnom ministarstvu, nadležnoj službi zaštite i općinskom organu uprave nadležnom za poslove urbanizma i katastra s ciljem provođenja mjera utvrđenih u tač. II-V ove odluke i nadležnom općinskom sudu radi upisa u zemljišne knjige.

VII.

Sastavni dio ove odluke je obrazloženje sa pratećom dokumentacijom koje je dostupno na uvid zainteresiranim licima u prostorijama i na web-stranici Komisije (<http://www.aneks8komisija.com.ba>).

VIII.

Prema članu V stav 4. Aneksa 8. Općeg okvirnog sporazuma za mir u Bosni i Hercegovini, odluke Komisije su konačne.

IX.

Ova odluka stupa na snagu danom donošenja i objavit će se u «Službenom glasniku BiH».

Ovu odluku Komisija je donijela u sljedećem sastavu: Zeynep Ahunbay, Amra Hadžimuhamedović, Dubravko Lovrenović, Ljiljana Ševo i Tina Wik.

**Predsjedavajući Komisije**

**Dubravko Lovrenović**

Broj: 05.2-02-1026/03-4  
15. marta 2006. godine  
Sarajevo